

Missionaliteit in die NG Kerk

Deur Lourens Bosman

1. WAAR STAAN ONS NOU?

In 2011 aanvaar die NG Kerk 'n missionale ekklesiologie as die vertrekpunt oor hoe ons oor die kerk en bediening dink. Hierdie verteenwoordig 'n baie groot en fundamentele skuif. Omdat dit 'n kultuurskuif verteenwoordig, is dit nie iets wat oornag gebeur nie.

Waar staan ons tans en hoe dink ons oor die pad vorentoe? Eerstens 'n aantal uitsette uit 'n opname wat gemaak is by 'n groep leiers in die kerk wat met die missionale roeping gemoeid is. Die navorsing is gedoen deur dr Pieter van der Walt en Anka du Plooy.

1.1 Watter groot skuiwe het intussen reeds begin plaasvind?

1. Daar is 'n prinsipiële teologiese skuif na 'n Trinitariese teologie met die klem op die lewende God, wat in 'n liefdesgemeenskap met God self (Vader, seun en Gees) bestaan en aktief handel in die wêreld.
2. Daar is 'n herwaardering van die plaaslike gemeente as die kern van kerkwees en die plek waarvan die kerk haar roeping sal uitleef. Daarmee saam is daar 'n afskaling in die siening van die belangrikheid van die verband.
3. Denke skuif oor die roeping van die plaaslike gemeente (eklesiologie):
 - van instandhouding, versorging, selfhandhawing en oorlewing ('n Volkskerk, die Christendom en institusionele paradigma)
 - na 'n (alternatiewe) gemeenskap wat deur God versamel word met die oog op: koinonia, dissipelskap, geloofsvorming, roepingsbesef, navolging van Christus en diens aan die plaaslike gemeenskap (Koninkryksp paradigma).
4. **Gemeentes word toenemend kontekstueel verstaan. Dit beteken dat een organisatoriese bloudruk en een uitdrukking van roeping nie oral pas nie, maar van plek tot plek mag en moet verskil.** Kontekstualiteit van gemeentes behoort ook aangevul te word met 'n diversiteit van vorming.
5. Skuiwe in ampsbeskouing: Rol van die predikant skuif van amptelike, sentrale, institusionele figure na geloofsonderskeidende teologiese leiers wat koinonia skep en gelowiges toerus en bemagtig. Mag word gedeel.
6. Die 2011 besluit legitimeer missionaliteit en skep ruimte vir leiers op alle vlakke om hulle te beywer vir missionale transformasie.
7. Opsies vir kerkplanting / vorming van nuwe geloofsgemeenskappe word ondersoek.


1.2 Wat moet nog gebeur?

2. Huidige predikante moet heropleiding ontvang sodat hulle die vermoë ontwikkel om gelowiges te kan toerus vir die verbeeldingryke uitleef van hul roeping.
3. Predikante moet bemagtig word om as leiers te funksioneer wat die gemeente inspireer en mobiliseer, nie net as pastors en leraars nie.
4. Die kerkverband moet nou skuif vanaf missionaliteit as teologiese raamwerk na missionale praktyke, houdings en gewoontes.
5. Alle gemeentelidmaats behoort deurlopend aggressief blootgestel te word aan werklikhede buite hul eie veilige omgewing.
6. Gemeentes behoort volhoudend by mekaar te leer en saam te innoveer.
7. Ons benodig praktiese modelle van missionale gemeentes wat werk en volhoubaar is.

2. WAT HET DIE AFGELOPE 2 JAAR GEBEUR TOV ONS VERSTAAN VAN MISSIONALITEIT?

Ons begin verstaan dat ons gestuurdheid die hele bestaan van die kerk raak. Die skuif van 'n *missionêre* gemeente na 'n *missionale* gemeente is nie net 'n kosmetiese verandering van terme nie, maar wil iets sê van die skuif van 'n projekgedrewe benadering (missionêr) na 'n holistiese siening (missionaal).

Die onderskeid tussen "club and missional churches" (McNeal) is 'n eufemisme: inderwaarheid is dit 'n onderskeid tussen gehoorsame en ongehoorsame kerke. God se bedoeling met die kerk is dat ons sal deelneem aan sy sending. Die kerk het nie 'n sendingroeping nie, die sending van God het 'n kerk.



1. Kom in en word deel

2. Word verander

3. Maak 'n impak

Mens lees hierdie prentjie van binne na buite:

Ons werk met 'n TRINITARIESE teologiese onderbou. Dit is die simbool in die middel van die prentjie. Wie God as Drie-eenheid is, sê wie ons kan wees. Dit is omvattend, maar ons lê veral klem op die volgende:

- God roep ons om in diep gemeenskap met God te leef (Theosis, Christus-gelykvormigheid).
- Daar is 'n diep eenheid tussen die Vader, Seun en Gees (Perigorese).
- God stuur die Seun en Gees na die wêreld (Missio Dei).
- God word mens en bemoei Hom met hierdie wêreld (Inkarnasie).
- Jesus ontledig Homself en offer Homself vir ons en die wêreld (Kenosis).
- God regeer en vestig sy heerskappy in hierdie wêreld (Koninkryk).

I. KOM IN EN WORD DEEL

Ons wil 'n kerk wees waar mense inkom en deel word van God se Koninkryk. Daarom gee missionale gemeentes aandag aan:

- Radikale gasvryheid en praktyke om vreemdelinge in te trek in die geloofsgemeenskap.
- Die ontwikkeling van 'n uitnoui-kultuur. Tans het NG Kerk-lidmate het nie 'n kultuur om mense in te nooi in die gemeente en sy aktiwiteite nie.
- Nuwe maniere om die evangelie te deel.

II. WORD VERANDER: HARTE, HUISE, KERKE.

God los ons nooit soos ons is nie, as jy deel is van sy Koninkryk, leef jy al meer onder sy heerskappy. Daarom is die volgende belangrik:

- Persoonlike geloofsvorming van ons lidmate. Harte moet verander.
- Die belangrikste geloofsvorming van kinders vind plaas in huishoudings. Ons verantwoordelikheid is om gelowige ouers te bemagtig om hulle kinders vir die Here groot te maak. Daarom die klem op huisgeloof met huishoudings as primêre plek waar geloof gedeel en roeping uitgeleef word.
- Alles lê egter nie by die verandering van individuele gelowiges en hulle huishoudings nie. Gemeentes as organisasies moet ook verander in hulle manier van doen, hulle eredienste, bediening en begroting om God se kollektiewe roeping vir die kerk effektief te dien.
- As ons praat van KERKE, gaan dit ook die breër kerk as instituut wat so georganiseer moet wees dat dit realisering van die missionale roeping moontlik maak. Dit raak o a die kerkverband en die Kerkorde.

III. MAAK 'N IMPAK

Die kerk as geheel is geroep om 'n IMPAK in die wêreld te maak. Dit gebeur deur:

- Gelowiges wat dag vir dag as gestuurdes in die wêreld leef en hulle roeping uitleef.

- Effektiewe projekte waardeur die kerk 'n impak maak in die wêreld. Missionaliteit is deel van die kerk se volgehoue stryd teen armoede en ongeregtheid. Ons fokus skuif al duideliker van armoedeverligting na armoede-voorkoming en opheffing. Vroeë Kindontwikkeling is 'n uitstekende manier wyse waarop die kerk betrokke kan raak.
- Diep vennootskappe met ander kerke en organisasies wat in die gemeenskap werk. Ons sal moet skuif van 'n kerk wat homself sien as een wat vanuit 'n posisie van rykdom, geleerdheid en mag kom om te gee en uit te deel, na 'n gelyke vennoot tussen ander vennote.
Die waardes van die Seisoen vir Menswaardigheid nl luister, omarm, respek en liefde gee vir ons die styl en houding waarmee die kerk na die gemeenskap gaan en vennootskappe sluit.
- Die vestiging van nuwe geloofsgemeenskappe. Hier dink ons baie meer organies as wat ons tevore onder kerkplanting verstaan het. Fresh Expressions help ons met 'n model vir die vestiging van nuwe geloofsgemeenskappe rondom 'n missionale gemeente. Dit gebeur deur die betrokkenheid van lidmate in die gemeenskap.
- Volhoubare professionele dienste in die gemeenskap. Die NG Kerk se vennote in die KMDR maak 'n uiters waardevolle bydrae in die gemeenskap deur maatskaplike dienste wat gelewer word.

3. WAT VRA DIE TRANSFORMASIE NA 'N MISSIONALE KERK VAN ONS?

1. 'n Sterk, trinitariese teologiese onderbou waarin die Missio Dei, teologie van die Koninkryk, soteriologie, en 'n holistiese trinitariese Godsbeeld helder en verstaanbaar verwoord word.
2. Die teologiese taal wat ons praat moet eenvoudig en bevatlik wees.
3. Gemeentes wat kleiner word of in 'n oorlewingstryd gewikkel is, moet gehelp word om nuwe (trinitariese) moontlikhede vir gemeenteweese te ontdek. Ons moet wegkom van die idee dat missionaliteit beteken dat sterk gemeentes groot projekte loods wat baie geld en bronne vra.

Alle groottes gemeentes kan die volgende doen:

4. Baie goeie aandag aan die persoonlike geloofsvorming van ons lidmate. Dissipelskap is die basis van die missionale beweging en daarsonder is dit gedoem tot mislukking.
5. Diep vennootskappe met ander kerke en organisasies wat in die gemeenskap werk. Ons sal moet skuif van 'n kerk wat homself sien as een wat vanuit 'n posisie van rykdom, geleerdheid en mag kom om te gee en uit te deel, na 'n gelyke vennoot tussen ander vennote.
6. Rus gelowiges toe om as gestuurdes in die wêreld leef.
7. Oefen in radikale gasvryheid en praktyke om vreemdelinge in te trek in die geloofsgemeenskap.
8. Ons sal moet soek na nuwe maniere om die evangelie te deel.
9. Bemagtig gelowige ouers, plaas klem op huishoudings as plek waar geloof gedeel en roeping uitgeleef word.
10. Effektiewe projekte waardeur die kerk 'n impak maak in die wêreld. Hier is dit veral van belang dat ons fokus sal skuif van armoedeverligting na armoedevoorkoming en opheffing.
11. Die plant van nuwe geloofsgemeenskappe rondom bestaande gemeentes.

Wat die breër kerk betref, is die volgende belangrik.

12. Ons moet soek na maniere om volhoubare professionele dienste in die gemeenskap te lewer.
13. Die organisasoriese transformasie van bestaande kerke en kerklike strukture om die roeping van die kerk effektief te dien.
14. Nuwe opleidingsmoontlikhede, hersiening van die Kerkorde.